

Nwa wù Bol gè san fε kintaashε ki Efesu le Fiε fi le a Nwa wu Efesu wunε le

Nwa wunε gè san Bol wù mwa ntun wu Jiso fε bamii ba mbεmε ba a kilaantεn kɔ Efesu le. Kikwεε ki fiε fi le a nwa wunε le, le nseesε wù Nyo gè seesε le wu lé wu gè wu banyε mwεε munchii mù fεwe bε mù fεkuu wu gèε a Jiso kuu. Bol le wu najε no fi gè jienyε fε bamii tu yi kintaashε le bε Nyo. Wu le wu dunyε no Nyo Tada gè ncha bamii be, wu lεsshε bimbefε biboo fede yi Jiso Kletu wù Mwa ye le, bε no wu gè ge njinε we yi bo le wù le Kiyo ki Yuude. Wu le wu tefε bamii ba wu le wu san fε bo le le bo chée kinche kɔ duunyi le bo le bo taashε wa bε Kletu. Bol le wu dunyε tε jé le jé le ki bege no kintaashε ki bamii ba mbεmε le muh wu mumwaa yi Kletu le.

Bikwεε bi mwεε mù le a Nwa wunε le

1:1-2 Fεnkeε

1:3-3:21 Ntan wù Nyo gè kεme fε Kletu le mo fε kintaashε ki bamii ba mbεmε le

4:1-6:20 Kinche ki bamii ba Kletu ba bafεn

6:21-24 Kimεε

¹ Le mε wù Bol, mwa ntun wu Kletu Jiso yi nkon wu Nyo le.

Nsanε nwa wunε fε bamii ba le ba Nyo ba Efesu le, ba lεme ba tεme yi Kletu Jiso le.

² Nyo wù Chiji wese besabεn bε Tada Jiso Kletu dúnyε fitele fi jonε fε bεn le, bo ka bo nyâ bεn bε muntele mù nyiεgee.

Mbuu wù fiih biyo bi bamii ba Kletu

³ Mbεεηse nyûme fε Nyo wù le Nyo wu ka nyume Chiji Tada wese besabεη wù Jiso Kletu le. Wu le wu nonη besabεη bε kimbone kichii kî fiih biyo biεsa kî jade manjuu ma fεwe le, no bee le be taashe yi Kletu Jiso le.

⁴ Fε Nyo fε wonη kfunε gè bee wu cha wa besabεη le besabεη lé be gê be tâashe besa ba Kletu, be yûude, bee nyûme jiale sεη a wu jii. Yi kinκonε ke le,

⁵ wu gè seese wa ki wu gê wu jô besabεη le le boonη be fede yi Jiso Kletu le. Wu gè ge noo, wu bii fiεε fi jone fε wu le, fi wu gè goone le fi nyûme.

⁶ Gè bee wu le mbεεηse gêene fε wu le yi nya yî kuge yî wu le wu nya besabεη le achiji fede yi Mwa ye wù le shêη ye le.

⁷ Wu gè bee wu suonη besabεη chiaaη yi bimbefε le bε kilεmε ki Mwa ye wunε. Fî le le, wu gè bee wu lεsše bimbefε biεsa besabεη, bii kinκonε kî baanη kî wu gè dunyε yi ye yese besabεη le.

⁸ Wu gè doo wu dunyε wu dunyε lo wesee bee le. Wu gè ge noo bε bvufεe bwe bvuchii mo ηkwaje we wuchii.

⁹ Nyo le wu ge wa besabεη kεε fiεε fi wu goone fi gè shee fi nyume yi nyilε le. Wu fε wu bii fiεε fi jone wu le no wu gè seese wa no wu lé wu tô wu gè fede yi Kletu le.

¹⁰ Wu gè seese le sege kife doo ki to ki kojε wu bânyε mwεε munchii kenε mù fεwe, kenε mù fεkuu, wu gêε a Kletu kuu wu nyûme kikwεε kiyu.

¹¹ Nyo gè bee wu cha tε bee ki bee nyûme bamii be yi Kletu le. Wu gè cha no wu gè seese wa baanη lo wu bii ηkwaje we le gēh yεεηyεεη no wu to wu gee

mweε mwe munchii wu bii ntaŋ wu we le no wu goone.

¹² Fi gè bee noo, wu ε bee ba gè bee bamii ba fwe ki bee gεε bvufee yi Kletu le ki bee chêe kinche kî gêe bvukugε bvû Nyo chûunyi, mbεεŋse gεene fε wu le.

¹³ Bεŋ tε gè taashε yi Kletu le sege bεŋ gè yu jε yî nchiεŋ yî le saaka wù jone wù too bε mbvuse fε bεŋ le. No bεŋ yu noo, bεŋ mo bεŋ leesε fitele yi Kletu le, Nyo ge njiŋε we yi ye yene le, wù le Kiyo ki Yuude kî wu gè ka bamii yu.

¹⁴ Kiyo ki Yuude kinε le nshuudε wu bvushε bvù besabεŋ lé be kême. Besabεŋ lé be kême sege Nyo mεse wu suuŋ bamii ba le be yi chiaaŋ yi bimbefε biboo le. Noo, bvukugε bwe chûunyi, mbεεŋse gεene fε wu le.

Bol buunε fε bamii ba Efesu le

¹⁵ Nle n'yu wa kune fitele fiena fi bεŋ le bεŋ leesε yi Tada Jiso le, mo kinƙone kî bεŋ kεme fε bamii le bachii ba le ba Nyo. Nε fiεε fi ge,

¹⁶ ŋge ndoo mbuune ntu ŋkwaji bεŋ. Nge mbaaŋ a nlu gε ki nyâa kiyone Nyo le kune bεŋ a buunε chaŋ le gε.

¹⁷ Mbuune ε Nyo wù le wu Tada wese besabεŋ wù Jiso Kletu, Nyo wù le Chiji bvukugε, wu nyâ bεŋ bε Kiyo kî lé ki nyâ bεŋ bε bvufee, ki gwênyε ajii a wene ki bεŋ kêε wu chuule.

¹⁸ Nka buune ε wu yûuse bvufee bwena ki bεŋ kêε fiεε fi bεŋ jiŋε fwe yi fi le, fi le fi, fi wu gè tεŋε bεŋ nje fi, bεŋ ka bεŋ kêε bvukugε bvù baan bvû bvushε bvû bamii ba le ba Nyo.

¹⁹ Nka buune le Nyo gwênyε bvufee bwena ki beη kêε bvun̄ga bwe bvù fede bvun̄ga bvuchii. Le bvun̄ga bvù baan̄ bvunε bvù wu lene yu yi besabeη ba le ba leesε fitele yi wu le.

²⁰ Le bvun̄ga bvuyu bvunε bvù wu gè leη yu fε wu bvûsε Kletu yi kwe le, wu beεηsε wu, wu shishε a kibo ke kinchiεη le won̄ wù fεwe le.

²¹ Kletu kuge wu fede mwεε mù sage fεwe munchii mo bvunfon̄, mo bvun̄ga, mo bvukugε bvuchii. Wu ka keme jee ch̄i kuge ch̄i fede ajee achii a ba tεηε bamii yu. Gε wu nyu noo gεh yi kife kinε le maa gε. Wu lé wu gē wu nyû noo yi kife k̄i too le tε.

²² Nyo le wu gεε mwεε munchii a wu kuu, wu ka wu gεε wu le wu nyûme kikwεε ki fiεε fichii fε kintaashε ki bamii ba mbεmε le.

²³ Kintaashε ki bamii ba mbεmε kinε le ye yi Kletu. Kletu mo wu nyume a wu yiεε wu koje nje kintaashε kinε, nyu wu wù gee le mwεε munchii yiise mu kooji a jé le yichii.

2

Nyo gè taashε besabeη be Kletu wu bvuse yi kwe le

¹ Gè bee fweele, beη nyu bamii ba gè kwe wa a kiyo le nje banchi ba Nyo ba beη gè ηgode mo bimbefε biεna

² b̄i beη gè chee beη gee. Beη gè chee beη bii nyu je ȳi bamii ba yi won̄ kfunε chee yi le, beη ka bii nfon̄ wu bvun̄ga bvù yi fii le. Le wu wù le kiyo kεε k̄i lene mεεse yi bamii ba tεεme bikwεε Nyo le.

³ Le gεh tε no besabeη bachii gè shee be chee. Besabeη gè chee bee gee mwεε mù nyan̄ yi ye

yí ñwɛɲe goone, bee bii mwɛɛ mù nyan yi ye bɛ banƙwajɛ besa goone lɛ besabɛɲ gɛɛ le. Besabɛɲ nɛ bamii ba wun gɛ bee lo bamii ba shɛɲ tɔɔnyi Nyo bɛ bo gɛh yɛɲyɛɲ nɛ no muh wu wun wuchii le.

⁴ Geenɛ Nyo wù le wu yisɛ bɛ yii fɛ besabɛɲ le gɛ kɔɲ besabɛɲ baan,

⁵ wu taasɛ besabɛɲ bɛ Kletu wu bvusɛ yi kwe le mo no besabɛɲ gɛ bee be kwe wa nje banchi ba Nyo baa ba bee gɛ ñgode. Nyo gɛ bvusɛ bee nyu nje fitele fie fi jonɛ.

⁶ No wu gɛ taasɛ besabɛɲ bɛ Kletu Jiso wu bvusɛ bee yi kwe le noo, wu mo wu bɛɛɲsɛ besa bo wu shiishɛ besa bo yi won wù fɛwe le.

⁷ Wu gɛ ge noo wu lɛ ge doo nyúme yi kife kɪ too le, wu dúnyɛ kɪɲkɔɲ kɪ baan kɪ tanlo muh gɛ ka wu beji gɛ. Fitele fi jonɛ finɛ le wu dúnyɛ wa besabɛɲ le yi kɪɲkɔɲ ke le fɛ besabɛɲ le fede yi Kletu Jiso le.

⁸ Bɛɲ kɛɛ lɛ Nyo gɛ bvuuuse bɛɲ nyu nje fitele fie fi jonɛ fede yi fitele fi bɛɲ gɛ leesɛ yi Kletu le. Gɛ finɛ fiɛɛ nyu bɛɲ ba gɛ ge gɛ. Le nnya yi Nyo.

⁹ Gɛ nyume nje lɛme chimi chí muh gɛ lɛɲ fɛ wu kɛmɛ, wu lɛ keefe muh nyume yu wù já wu chíaaase ye gɛ.

¹⁰ Fiɛɛ fi le, le lɛ besabɛɲ le no bee le nɛ mɛɛsɛ, le Nyo wù lɛɲ bɛ kibo ke. Wu le wu taasɛ besabɛɲ bɛ Kletu Jiso wu fɛ besabɛɲ tu bamii ba bafɛɲ, wu lɛ besabɛɲ lɛne chilɛme chí jonɛ chí wu gɛ seesɛ wa baan lo lɛ le chi, chí besabɛɲ lé be gɛ be chɛɛ bee lɛne.

Chikfuu chí chifɛɛ le wa muh wu mumwaa yi Kletu le

¹¹ Bɛɲ bamii ba le gɛ Bajuu gɛ, bɛɲ tâne fiɛɛ fi bɛɲ gɛ shee bɛɲ nyume fweele. Bajuu ba tɛɲɛ bikwɛɛ

biboo le, bo le bamii ba ba le ba chvuu bo yeh, ba gè tɛnɛ bɛn le bɛn le bamii ba le binshushu. Nchvuse yeh wunɛ nyu fiɛ fi ba gee nyu yi ye yi muh le bɛ chiaaŋ.

¹² Bɛn ntâne le gè bee segekɛɛ, bɛn kɛme gɛ fiɛ ki bɛn gè bɛ Kletu gɛ. Gɛ bɛn gè bee antɛnɛ a kingogɛ ki bamii ba Nyo ba le ba Ishwala gɛ. Gɛ bɛn gè kɛme fiɛ ki bɛn gè bɛ mankaŋ mà ŋka, mà Nyo gè gwo bɛ bo gɛ. Bɛn gè bee gɛh lo fiena yi nshɛn le fɛnɛ bɛn kɛme gɛ fiɛ fimi fi bɛn jiinɛ fwe yi fi le gɛ, bɛn kee gɛ tɛ Nyo gɛ.

¹³ Geenɛ, yi mɛɛsɛ le bɛn le bɛn taasɛ wa bɛ Kletu Jiso, bɛn ba gè shee bɛn nyu je yɪ ndefe le fɛ Nyo le, wu le wu jo wa bɛn wu to bɛ bɛn mbebe ye le fede yi kilɛmɛ ki Kletu le.

¹⁴ Le wu wù Kletu kibɛɛ wù to bɛ nyiɛgee fɛ besabɛn le. Wu le wu ge wa Bajuu bɛ bamii ba le gɛ Bajuu gɛ tu muh le wu mumwaa. Wu le wu kesɛ wa kimbe ki kingaye kɪ le kimbanɛ kɪ gè shee ki nyu a besabɛn ntɛnɛɛ.

¹⁵ Wu le wu nya ye ye ki wu kwê ki wu chíiɛ nchi bɛ mwɛɛ mù nchi duu le ba gèe ki ba nyú bamii ba Nyo. Wu ge noo wu le wu táasɛ muh wuchii yi ye le, bo tû wa muh wu mumwaa wù fwɛn yi kijusɛ ki bamii ba bafɛɛ le. No wu ge noo, wu mo wu to bɛ nyiɛgee.

¹⁶ Kwe ye yi kintaŋ le, le yi taasɛ chikfuu chí chifɛɛ chi to fɛ Nyo le yi ye le yimimia, wu mo wu yuuyɛ kimbanɛ kiboo yi kintaŋ le ki ka.

¹⁷ Wu gè be wu to wu feɛ saaka wù too bɛ nyiɛgee bɛn ba gè bee je yɪ ndefe le, wu feɛ tɛ saaka wuyu wunɛ bamii ba le mbebe le.

¹⁸ Ge wu besabɛn bachii fɛ bee kɛmɛ je ki bee to

fɛ Chiji wese le fede yi Kiyo le kimimia.

¹⁹ Noo, gɛ bɛɲ baan bantolo gɛ, kɛnɛ bamii ba bɛle gɛh lo gɛ. Bɛɲ le wa boon ba won bena bamii ba le ba Nyo, bɛɲ le tɛ bamii ba yeh yi Nyo le.

²⁰ Yeh yinɛ le ba jonɛ yi kichi kɪ le boon ba ntun ba Jiso bɛ bamii ba teede bantun ba Nyo le, Kletu Jiso kibɛɛ le tɛdɛ chi buu chi yeh yiyu.

²¹ Le yi ye ye le wù yeh yiyu yichii le yi taashɛ yi tu yi kuu ki yi gɛ yi tó yi nyúme yeh yí yuude fɛ Tada le.

²² Bɛɲ tɛ le bɛɲ taashɛ bɛɲ ba joon yi Kletu le, nyume kijusɛ kɪ Nyo chee fo a Kiyo ke le.

3

Bol le muh wu nfejɛ fɛ bamii ba le gɛ Bajuu le gɛ

¹ No Nyo le wu ge wa mwɛɛ munɛ fɛ bɛɲ le nɛ, mɛ mo mbuune fɛ bɛɲ le. Mɛ wù Bol le yi ncha le nje saaka wù kune Kletu Jiso. Nlɛne ncha wunɛ nɛ nje bɛɲ bamii ba le gɛ Bajuu gɛ.

² Nkwaji lɛ bɛɲ le bɛɲ yu wa no Nyo gɛ cha mɛ wù nya lɛme chí lɛ ntéede kune kinɲonɛ ke fɛ bɛɲ le.

³ Fiɛɛ fiyu finɛ le fi gɛ shee fi nyu nyilɛ le, Nyo nyu wu gwenyɛ wa ajii awan n'yɛɲ. Nle nsan wa shige kune fi fɛ bɛɲ le.

⁴ Nɛ bɛɲ tɛɲɛ lo, bɛɲ yɛɲ fiɛɛ fi nkeɛ kune kinyilɛ kinɛ kɪ gɛ bee kune Kletu.

⁵ Gɛ bee fwɛele Nyo gɛ baan ge gɛ kinɲogɛ ki bamii kɪ segekɛɛ kɛɛ kinyilɛ kiyu gɛ. Mɛɛse Kiyo ki Nyo le ki dunyɛ wa boon ba ntun ba Jiso ba yuude mo bamii ba teede bantun ba Nyo le, bo kɛɛ.

⁶ Fiɛɛ fi le nyilɛ le finɛ le lɛ, bamii ba le gɛ Bajuu gɛ, Nyo le wu nya tɛ bo bɛ bvushɛ bvù wu le wu gɛɛ

fɛ bamii be le. Bo le wa ye yimimia bɛ bo, ŋka wù Nyo gɛ fɛ fɛ Bajuu le, le wa tɛ fɛ bo le no bo le bo taashɛ bɛ Kletu Jiso fede yi saaka wù jone wù bo le bo bɛɛŋ wu le.

⁷ Nyo gɛ ge lɛ mɛ nyûme mwa lɛme wu saaka wù jone wunɛ. Lɛme chinɛ gɛ bee nnya yĩ wu gɛ nya yi kinƙonɛ ke kĩ wù kɛme fɛ mɛne. Wu gɛ jo bvunɔa bwe wu lɛŋ bɛ bvɔ yi ye yaŋ le ki wu nyá lɛme chinɛ lɛ nlêne.

⁸ Mbaan a mbu gɛh lo mo muh wu shige a ŋgoo yi bamii bachii ba le ba Nyo le gɛ. Geen Nyo gɛ dunyɛ fitele fie fi jone fɛ mɛne wu nya lɛme chinɛ mɛne wu lɛ ŋgêŋ nfêeji saaka wù kune bvukugɛ bvɔ Kletu bvù kɛme gɛ mbeje fɛ bamii ba le gɛ Bajuu le gɛ.

⁹ Gɛ bee lɛ bamii bachii kêɛ adanadan ntaŋ wu kinyilɛ ki fiɛɛ kĩ Nyo wù gɛ fɛ mwɛɛ munchii wu gɛ shee wu nyiile yi ye le yi biluŋ le biluŋ le.

¹⁰ Ntaŋ wunɛ gɛ bee lɛ lé gɛ nyûme kife kĩ mɛɛɛɛ le, Nyo lé wu fɛ wu fede yi kintaashɛ ki bamii ba mbɛmɛ le, banchɛndaa bɛ biyo bĩ kɛme bvunɔa ki bi sâge manjuu mà fɛwe le, bo yêŋ bvufɛɛ bvɔ Nyo bvù le jé le jé le.

¹¹ Wu gɛ ge fiɛɛ finɛ wu bii no wu gɛ seese wa fɛŋkɛɛ. Wu nyu wu ge wa fiɛɛ fiyu fede yi Kletu Jiso wù Tada wese besabɛŋ le.

¹² Le nje wu wù besabɛŋ le bee kɛmɛ je ki bee tôo mbebe Nyo le bee kême gɛ nfaan gɛ, kɛnɛ kimanɛ nje fitele fi besabɛŋ leese yi wu le.

¹³ No fi le noo, mɛ mo ŋkude lo chiaan lɛ keefe shêŋ kwê bɛŋ nje ŋge wù n'yede nje bɛŋ gɛ. Bɛŋ lé bɛŋ kême bvujonɛ bvuyu.

Bol ka wu buunɛ fɛ bamii ba Efesu le

14 Le nje mwεε munε mù ntune anyuu a Chiji wese besabεη fwe,

15 wù ajee a chikfuu chichii chĩ fεwe mo chĩ fεkuu jade fε wu le.

16 Ntune anyuu nlege, mbii bvukugε bwe bvù le bvù baan le, le wu nyâ bεη bε bvun̄ga fede yi Kiyo ke le, bvù gē muntele mwεna tēme.

17 Noo, Kletu mo wu chēe a muntele mwεna le no bεη leese fitele yi wu le. Mbuune tε le kin̄kon̄ε nyūme yi ye yene le ki gē bεη chīme gεη nje kite bε yeh yi ba joon̄ yi kichi ki tēme le,

18 wu le bena bamii bachii ba le ba Nyo kēme bvufee bvù tan̄lo bεη kēε kin̄kon̄ε ki Kletu. Kin̄kon̄ε ke kinε keme mbvu baan̄ ki keme ndefε fεkuu bε ndefε fεwe baan̄, ki lee tε kuu baan̄.

19 Mbuune le tan̄lo bεη kēε kin̄kon̄ε ke kiyu kī yage bamii ki bo kεε, wu le bεη tan̄lo bεη nyū a bεη yiε bε fiεε fi Nyo le fi fichii.

20 Besabεη mo be bēεηse Nyo. Le wu wù tan̄lo wu ge fiεε fichii bε bvun̄ga bvù bwe bvù lene yi ye yese besabεη le. Wu tan̄lo wu gē wu fē lo no besabεη biide kεne no tan̄lo besabεη kwaji.

21 Mbεεηse nyūme fε wu le nje kintaashε ki bamii ba mbεme mo nje Kletu Jiso yi kife le kichii mo segechii ki kage gε. Fi nyūme noo.

4

Bamii ba Kletu nyūme yi kintaashε le

1 Noo, mε wù Bol wù le muh wu ncha nje Tada Jiso, nlege lo bεη le bεη chēe kinche kī le kī kojε kī Nyo tεne bεη le bεη chēe yi ki le.

² Bɛɲ shíishi bikwɛɛ biɛna fɛkuu bɛɲ ka bɛɲ nyûme wɛɛ, bɛɲ kâane shéɲ. Bɛɲ jôde muh le muh no wu le yi kinƙonɛ le.

³ Bɛɲ mône chuule ki bɛɲ nyû gɛh yi kintaashɛ kî Kiyo ki Yuude le ki to bɛ ki fɛ bɛɲ le, no bɛɲ chee yi nyiɛgee wù taashi bamii le.

⁴ Ye yi bamii ba mbɛmɛ le yimimia, Kiyo ki Yuude nyu kimimia. Le gɛh yɛɛɲyɛɛɲ no fiɛɛ fi Nyo gè tɛɲɛ besabɛɲ le bee jîɲɛ fwe yi fi le, le tɛ fimimia.

⁵ Tada le gɛh wu mumwaa, mbɛmɛ nyu gɛh wu mumwaa, nleesɛ wù ba leese bamii a joo le gɛh wu mumwaa.

⁶ Nyo le gɛh wu mumwaa wù le Chiji wese besabɛɲ bachii. Wu le awe a mwɛɛ munchii, wu lɛne fede yi besabɛɲ le bachii, wu le tɛ antɛnɛɛ a besabɛɲ bachii.

⁷ Fi le tɛ le Kletu le wu nya nnya fɛ muh le wu mumwaa wu mumwaa besabɛɲ le, bii nfe wu nnya ye fɛ mwɛdɛ le.

⁸ Nɛ fiɛɛ fi ba san a Nwa wu Nyo le le,
 “Sege wu gè bɛnɛ wu gɛɛɲ fɛwe,
 wu gè bee wu ge bamii ba wu gè kooyɛ tu bo bii wu le.

Wu gè bee wu nya nnya bamii le.”

⁹ Ki jɛmɛ le, “Wu gè bɛɛɲ wu gɛɛɲ fɛwe” le le la? Fi duunyi le wu gè bee wu ya wu shii wu gɛɛɲ a nshɛɲ kuu.*

¹⁰ Noo, wu wuyu wù gè shilɛ wu to fɛkuu le gɛh tɛ wu wù gè bɛnɛ wu fe lo kibvulɛ kichii wu gɛɛɲ awe, wu le manjuu manchii tanlo ma nyû ma yíɛ bɛ wu.

* **4:9** Kɛnɛ le, wu gè bee wu ya wu shii wu to fɛkuu fɛnɛ.

¹¹ Le gɛh wu wù gɛ nya nnya bamii le. Wu gɛ nya bamu lɛ bo nyûme boon be ba ntun, wu nya bamu lɛ bo sêne mwɛɛ mù bo yuge Nyo jɛme, bamu ba jîenyi bo fêeji saaka wù jone wu Nyo, bamu ba jîine fɛ kintaashɛ ki bamii ba mbɛmɛ le bo ka yeyi bamii.

¹² Wu gɛ nya nnya yiyu yinɛ ki wu sêse bamii ba le ba Nyo yu ki bo kôjɛ ki bo lêne lɛme che, bo jône ye yi Kletu yî le kintaashɛ ki bamii ba mbɛmɛ le,

¹³ gɛɛɛ bu kife kî besabɛɛ bachii le be gɛ be nyume wa muh wu mumwaa yi mbɛmɛ wese besabɛɛ le bɛ yi fiɛ fi besabɛɛ kee kune Mwa Nyo. Nɛ besabɛɛ chee noo, fi ge besabɛɛ nyume be ta bee kojɛ bee mɛsɛ bee nyume wa no Kletu le wuchii.

¹⁴ Noo, besabɛɛ gɛ ka be nyume nje boon ba shige, ba kfuu chi ban'yeyɛ ba la doo bo fede bo fiine bɛ bo, bo gɛɛne fwe bo tuu jin nje fiɛ fɛ fii kale bɛ fi gɛ. Besabɛɛ gɛ ka bee nyûme tɛ nje bamii ba bamii ba jîenyi bo wɛɛne lo bo lɛɛde bo bɛ chimbian chî bo seese le gɛ.

¹⁵ Besabɛɛ kême ki bee sêne fiesa nyume kinchiɛɛɛ yi kinɔɔɛ le, bee mo be kuu a jé le yichii ki bee to be nyûme nje Kletu wù le kikwɛɛ kesa besabɛɛ.

¹⁶ Le wu wù gee fɛ bimbe bi ye ye le bichii bî le bi shuuyɛ bi taashɛ yi ye le fɛ bi kuu, bi joone ye ye yi kinɔɔɛ le no kimbe lɛne che lɛme kimbe lɛne che chuule.

Kinche kî kege bɛ kî kifɛɛ

¹⁷ Yi mɛɛse le, a jee chi Tada le ngoone ki njême ŋka nchiise lo bɛɛ le lɛ keefe bɛɛ ka bɛɛ chêe nje bamii ba kee gɛ Nyo gɛ. Banɔkwaje baboo to bo nyume ba achiji.

18 Bvufee bvuboo le bvu kijibe le. Bo le je yi ndefe le fe kinche ki Nyo duunyi le, nje bo le bo fan lo Nyo, le nje bo teeme bikwee.

19 Bo le bo yune bikwee baan. Bo le bo lees bikwee biboo antene a nyien yi kinjan, ye yiboo yufe geh ki bo gee chikfuu chi nyien yichii.

20 Ge fine nyu fiee fi ba ge yeye ben yu kune Kletu ge.

21 Nkwaji le ben le ben yu wa kune wu, ba yeye wa ben ba taashe be wu, be kinchieen ki kune Jiso.

22 Ben mo ben baa ye yi kege yi ben ge chee kinche ki kege yu yi chege wa nje mwee mu nyien mu ben ge shee ben gee.

23 Ben kuse bankwaje ba ben keme bo nyume bankwaje ba bafen.

24 Ben ji ye yi fien ye yene le yi Nyo le wu ge yi fiene wu. Yi chine le ye yi kinche ki le nchieen nchieen ki chaan be ki yuude.

25 Fi mo fi nyume le, ben chine chimbien le, muh jeme nyume kinchieen mwa bwee le nje besaben bachii le bimbe bi ye yimimia.

26 Ne muh toonyi shen, wu yene le keefe wu ja wu ge kimbefe ge. Keefe wu chine juu sele wu baan wu toonyi shen ge.

27 Keefe wu nya je debele lee yo ge.

28 Ne muh chone bvuchon, wu chine yu, wu tu wu lene nyume lene chi jone be chiaan ye, wu le tanlo wu keme fiee fi wu fi te bamii ba fuude yu.

29 Ben yene le keefe njeme wu saane bude de yene le ge. Muh jeme fiee nyume fi jone fi tanlo fi joone lo bamii yi fiee fi bo fuge le, wu le njeme we too nyu be nfi fe bamii ba yuge le.

³⁰ Keefe beη gêe fiε fi Kiyo ki Yuude ki Nyo nyû yii yii gε. Kiyo kinε le njinε wù le nshule wu Nyo yi beη le, ki wu dûnyε le le wu wù kεme beη, sege juu to chi koje wu mêse wu sûun beη chiaaη yi ηε le.

³¹ Beη nôη lo muntele mù saase, be shén yĩ beεne, mo shén yĩ toonyε, mo waa, mo ki chênε be ajee a bamii, mo muntele mù mbefe.

³² Beη kême nyume kinε kĩ jone be muntele mù njone fε muh le muh le. Muh nε ge kimbefe be muh, wu lêshε wu nyá wu le gεh yεηnyεη no Nyo gè fe yi Kletu le wu lêshε biεna bimbefe.

5

Bamii ba Kletu chêe nje bamii ba n'yu

¹ No beη le boon ba Nyo ba wu konε nε chuule, beη mo beη bεge be wu.

² Beη chêe yi kinε le yεηnyεη no Kletu gè kon besabeη wu nya kikwεε ke fε besabeη le. Nnya ye yinε gè bee kintanyε ki saane ki gwee wun fε Nyo le.

³ Mwεε nje kinjan be kinche ki nyien kichii mo kin'yεε ajii, gε nyume mù ba bεme mu a beη ntεnεε gε, nje gε munε nyume mwεε mù nyûme a bamii ba le ba Nyo ntεnεε gε.

⁴ Fi baan koje gε le njεmε wù nyiεne be njεmε wu kiyun, mo ηgune chi achiji bûde de yene le gε. Beη nyáa gεh nyume kiyone Nyo le.

⁵ Beη kée nchiεη le muh wù jane kinjan, kεnε muh wù gee nyien, kεnε muh wù yεede ajii, gε wu kεme kijuse antεnεε a bvunfon bvu Kletu be Nyo gε. Muh wù yεede ajii to wu jode mwεε nje nyo fε wu le.

⁶ Keefe beη bêeη muh lêe beη be njeηe wù achiji kune mwêe mune γε. Beη kêe le le mwêe muyu mune mù to mu gee shén yi Nyo beene wu be bamii ba yuge γε wu le γε.

⁷ Noo keefe beη tâashi ye bena baa bamii γε.

⁸ Gè shee nyume fweele beη nyu bamii ba kijibe. Geenε mεese beη le beη taashε be Tada, beη le wa bamii ba n'yu. Beη mo beη chêe nje bamii ba n'yu.

⁹ Fiεε fi n'yu to wu too be fi le kinche kî jonε be kî chaan mo kî duunyi nchiεεη.

¹⁰ Beη môn ki beη kêe fiεε fi jonε Tada le.

¹¹ Keefe beη lêese chiaan fe mwêe mù achiji mu kijibe le γε. Beη bvûuse lo mu fe waan.

¹² Le lo fiεε fi bvuya ki jεme kune mune mwêe mù bobaa bamii gee nyile le.

¹³ Geenε fiεε fichii fi n'yu baan yi fi le to fi gwenyε ba yede fi le,

¹⁴ nje fiεε fichii fi le fi gwenyε to nyume n'yu. Le fiεε fi ge fe ba duu fiεε fimi le,

“Wo wù lefe, kânse!

Bú yi kwe le, n'yu wu Kletu gê wu bâan yi ye yo le.”

¹⁵ Noo, beη mo beη jîenyi beη toome kika yi kimi le. Keefe beη chêe nje biyun γε. Beη chêe nyume nje bamii ba kεme bvufee.

¹⁶ Beη mône ki beη gêe mwêe chuule yi kife kî beη kεme le, nje aju a mεese le a befe.

¹⁷ Noo, keefe beη nyûme biyun γε. Beη mône ki beη kêe fiεε fi Tada kônε le beη gêe.

¹⁸ Keefe beη mûu mbvuun mo kôode beη γε. Fine le fiεε fi chenε lo be bamii. Beη nyûme beη yîse nyu be Kiyo ki Yuude.

19 Bɛɲ jême ye yene le a baŋkee ba a Nwa wu Mbɛɛɲsɛ le*, mo baŋkee bamu ba n'yuuse, mo ba Kiyo ki Yuude nyaa bɛɲ le. Bɛɲ yêene noo bɛɲ bɛɛɲsɛ Tada a muntele mwɛna le.

20 Bɛɲ nyâa kiyone Nyo wù Chiji le kife le kichii bɛ yi fiɛɛ le fichii yi jee chi Tada wese besabɛɲ wù Jiso Kletu le.

Nteefɛ fɛ bikɛsɛ bɛ bilɛɲ baboo le

21 Bɛɲ nyâ bikwɛɛ biɛna muh bɛ muh bii ɲgvune wù bɛɲ kɛme fɛ Kletu le.

22 Bɛɲ bikɛɛ ba bamii, bɛɲ nyâ bikwɛɛ biɛna bilɛɲ bɛna le no bɛɲ le bɛɲ nya Tada le,

23 nje jwɛɲsɛ le kikwɛɛ ki kwɛsɛ, gɛh no Kletu le kikwɛɛ ki kintaasɛ ki bamii ba mbɛmɛ. Kintaasɛ kiyu le ye ye, wu kibɛɛ le Mbvuse wuyu.

24 Noo, bikɛɛ ba bamii kɛme ki bo nyâ bikwɛɛ biboo bilɛɲ baboo le yi fiɛɛ le fichii gɛh yɛɲyɛɲ no kintaasɛ ki bamii ba mbɛmɛ le ki nya kikwɛɛ Kletu le.

25 Bɛɲ bilɛɲsɛ, bɛɲ kôɲɛ bikɛɛ bɛna gɛh yɛɲyɛɲ no Kletu gɛ kɔɲ kintaasɛ ki bamii ba mbɛmɛ wu nya kikwɛɛ ke, wu kwe nje ki.

26 Wu gɛ nya kikwɛɛ ke ki wu gɛ le kintaasɛ kiyu yâude no wu gɛ chugɛ ki bɛ joo mo jɛ ye.

27 Wu gɛ seɛsɛ kintaasɛ ki bamii ba mbɛmɛ kiyu noo wu le wu jô ki yi ye ye le nje kwɛsɛ wù fione wu kɛme gɛ ɲgile gɛ, wu nyume lenɛlenɛ wu kɛme gɛ fiɛɛ fimi fi befe gɛ, wu yuude wu nyume gɛ bɛ jiale yi ye ye le gɛ.

* 5:19 Nwa wu Mbɛɛɲsɛ wunɛ le wù Dabi gɛ san.

²⁸ Le geh yeenyeeη no bilen̄se te keme ki bo kōne bikεε baboo geh no bo kon̄e ye yiboo. Ne muh kon̄e kwεε, tu wu kon̄e nyu kikwεε ke.

²⁹ Gε muh nyume yu wù ban̄e ye ye gε. Wu to wu nyan̄e lo yi, wu jiin̄e fε yi le chuule. Le geh yeenyeeη no Kletu gee fε besabēη ba le kintaashε ki bamii ba mbem̄e le,

³⁰ nje besabēη le bimbe bi ye ye.

³¹ Le fiεε fi ba gē san̄ a N̄wa wu Nyo le le,
“Le nje fin̄e fiεε fi jwēηse lé wu chíne chiji bε bwee le,

wu mo wu tâashε bε kwεε,

bo bafεε mo bo tû wa muh wu mumwaa.”

³² Fiεε fimi nyiile antēη a njem̄e wun̄e fi kuge baan̄, n'yen̄e fian̄ le fi jem̄e kune Kletu bε kintaashε ki bamii ba mbem̄e.

³³ Mo no njem̄e nε, muh wu mumwaa wu mumwaa bēη le keme ki wu kōne kwεε no wu kon̄e kikwεε ke, kwεse te yēη le wu nyāa ηgvun̄e fε jwēēη le.

6

Nteefε fε boon̄ bε bachiji boon̄ le

¹ Boon̄, bēη yūge bachiji bena bε ba bwee bena a je yi Tada le, nje fin̄e le fiεε fi kooji.

² Nchi wu Nyo, wù duu le,
“Wo ηgvūne chijo bε bwoo”,
le nchi wù fwe wù keme ηka fo.

³ N̄ka wuyu wun̄e le le,
“Muh wù gεede nchi wun̄e lé wu gē wu yūge njon̄, wu ka wu chē wesee yi nshēη le fεn̄e.”

⁴ Bachiji boon, fε beη gēe mwεε mù muntele sâase boon bena γε. Beη lêyi lo bo bo kûu bε n'yeyε mo nteefε yĩ le yi Tada.

Nteefε fε nfa bε bamii ba kεme bo le

⁵ Beη ba le nfa, beη yûge bachiji bikwεε bena ba yi nshεη le fεnε, beη fâane bo beη ka ηgvûune bo. Beη yûge bo le bε muntele mwεna munchii no beη yuge Kletu le.

⁶ Keefε beη gēe noo gεh sege jise chiboo le chi gwênnyε wu le ye jône bo bε beη γε. Beη gēe nyu nje nfa yi Kletu yĩ gee nyume fiεε fi Nyo goone bε muntele muboo munchii.

⁷ Sege beη doo beη lêne bo le, beη lêne bε njon gεh nje beη lêne nyu Tada le, nyume γε muh wu wun le γε.

⁸ Beη lêne, beη kwâji le fiεε fi jone fichii fi muh gee le wu nyu wu kême tε fiεε fi jone a Tada le, kεnε wu nyume nfwa kεnε wu nyume γε.

⁹ Beη bamii ba kεme nfa, beη kême tε bo a je yĩ jone le, beη yεne keefε beη kâji lo bo γε. Beη tâne le bena bo bachii kεme Chiji Kikwεε wu mumwaa fεwe, yi wu le yeye yeye yu γε.

Mwεε mu jεη mù Nyo nya besabεη le

¹⁰ Ki mεεse, ntu jεme beη le le beη lême beη tême yi Tada le, beη yême nyume yi bvunğa bwe bvû baan le.

¹¹ Beη jfi mwεε mu jεη munchii yi ye le nyume mù Nyo nya beη le, wu le beη tanlo beη lêεη beη tûη jεη bena ba debele a jé le yichii yĩ wu wεene yi le.

¹² Beη kêe le γε besabεη juu nyume bε bamii ba wun γε. Besabεη juu nyume bε mwεε munchii mù kême bvunğa bε bvukugε mù sage won wù

kijibe kfunε. Mwεε mune le biyo bi befe bichii bi le manjuu ma fεwe le.

¹³ Noo, beη mo beη jii mwεε mu jεη munchii mù Nyo nya beη le, wu le ge doo nyume aju a befe le, beη lême beη tême no beη lé beη gê beη nyûme beη ge wa fiεε fichii ki beη gê beη lême beη tême.

¹⁴ Noo, beη mo beη lême beη tême. Beη jô kinchiεεη ki nyûme nje kicha ki beη shule chin, beη jô kinche ki chaan ki nyume nje kichwa ki beη jile ki beη bânε gvûu yene yu.

¹⁵ Beη nyûme beη seesε wa ki beη fêejî saaka wù jone wù too be nyiεgee fε bamii le, finε nyume nje jé yi jεη yî beη leese yi bikaa le.

¹⁶ Ki bisε fo, beη lêese gεh nyume fitele yi Kletu le, finε fiεε le nje ηke wu jεη wù beη kεme abo. Le fi fi beη lé beη bânε mubiεη mù muh wu kimbefe wεε noon ηgu bεde yu.

¹⁷ Beη jô mbvuse wù Nyo le wu bvuse beη wu nyûme nje kifo ki jεη beη bôn, beη mo beη jô tε nyo yi jεη yî Kiyo ki Yuude nyaa yî le jε yi Nyo.

¹⁸ Yi fiεε le fichii, beη búune segechii beη bli no Kiyo ki Yuude duunyi. Beη doo beη buune beη bliide fiεε fichii fi beη goone Nyo le. Yi fifiεε le beη jîine chuule beη ka kâane shén segechii ki beη búune beη lege Nyo fε bamii ba le ba Nyo le bachii.

¹⁹ Beη búune tε fε mεne le sege ηaase jwe wan ki njεme, Nyo nyâ mε be fiεε fi njême, njême n'ya nfâane gε kune kinyile ki saaka wù jone wù wu Nyo.

²⁰ Le saaka wuyu wunε wù nle yi ncha le nje wu nje muh wù le jise chi Kletu. Beη búune le ndoo nlé ki njême, njême no ηkεme ki njême, n'ya fâane gε.

Kimεεε

²¹ Tichiku mwa bwee wese besabεη wu shén, wù lene lεme chi Tada bε fitele fie fichii lé wu sêεη fιεε fichii bεη le kune mε, wu ε bεη tε kêε no nle, mo fιεε fι ηgee.

²² Ntune wu fε bεη le bε ntaη wu ε wu tô wu gê bεη kêε no bee le, wu ka wu yûfε muntele mwεna.

²³ Nyo, wù le Chiji wese besabεη mo Tada Jiso Kletu nyâ bεη bε nyiεgee bε kinκonε mo mbεmε.

²⁴ Nyo dûnyε fitele fι jonε fε muh le wuchii wù kεme kinκonε kĩ kage gε fε Tada wese besabεη wù Jiso Kletu le.

Nchane (Ncane)
The New Testament in the Ncane language of
Cameroon: Nchane (Ncane) (New Testament+)

copyright © 2020 Wycliffe Bible Translators, Inc.

Language: Nchane (Ncane)

Contributor: Wycliffe Bible Translators, Inc.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-16

PDF generated using Haiola and XeLaTeX on 16 May 2025 from source files dated 16 May 2025

5108ebb0-51ad-5d6b-94ef-93cc302ed337